

Thandi u na siku ro biha



Namuntlha a ri ri siku ra Thandi ra ku velekiwa. Manana wa yena u n'wi nyikile bokisi leri phutseriweke hi phepha ra pinki. Endzeni ka rona a ku ri na wachi leyi a ku ri khale a yi lava.

"Ndza khensa manana! Ndza khensa tatana! I khale ndzi lava wachi ya pinki!" Thandi a tsaka swinene. "Ndzi ta kombeta Moyasi na Lisa wachi ya mina leyintshwa."


Manana wa yena u n'wi vukarhile.

"U va na siku ra ku velekiwa ra vukaye lerinene."

"Hatlisa," ku vula tatana wa yena.

"Handle ka swona bazi ra xikolo ri ta ku siya."

"Mi nga vileli tatana. A ndzi nga tlhelil
ndzi siyjwa hi bazi nakambe. Sweswi
ndzi na wachi naswona ndza swi tiva
leswaku bazi ri ta suka endzhaku ka 12
wa timinete," a hlamula hi ntsako a ri
karhi a suka a famba a ya exikolweni.



Thandi u chikile ebazini kutani a tsutsumela exikolweni hi nyanyuko lowukulu. A tsandzeka ku tikhoma a lava ku kombeta Moyasi na Lisa wachi ya yena ya pinki leyintshwa.

"Hambi Moyasi na Lisa va ta ku yini loko va vona wachi ya mina yo saseka."

Thandi u langutile wachi ya yena. "Ku na 20 wa timinete na 30 wa tisekene ku nga si ba nsimbhi ya xikolo. Ndzi na nkarhi wo ringanela ku kombeta Moyasi na Lisa wachi ya mina," a ehleketa.




"Xewani Moyasi na Lisa, tanani mi ta vona nyiko ya mina ya siku ra ku velekiwa!" ku vula Thandi.

Kambe Moyasi na Lisa va hunisa kutani va suka va famba.

"Moyasi! Lisa! I siku ra mina ra ku velekiwa namuntlha! Tanani mi ta vona wachi ya mina leyintshwa!" ku huwelela Thandi.

Hambiswiritano, Moyasi na Lisa va endle onge a va swi twangi. Va n'wi fularherile kutani va sungula ku hlevelana.

"Va rivele leswaku i siku ra mina ra ku velekiwa," ku ehleketa Thandi. "Xii, swi nga va swi lo yini?



Hi nkarhi wa bureki, Thandi u vonile
Moyasi na Lisa va tshamile ehansi ka
murhi va ri karhi va hlevetela.

Loko Thandi a tshunela, va sukile
va famba.

"Xii, swi nga va swi lo yini?" ku ehleketa
Thandi.

Hi nkarhi wolowo Ken a vitana, "Avuxeni
Thandi! Tana u ta tlanga na mina."

"A ndzi swi twisisi leswaku hikwalaho ka
yini Moyasi na Lisa va ndzi tsutsuma," ku
vula Thandi a byela Ken hi ku tsana.

"Yehe, u nga vileli wena Thandi. A hi
tlange bolo ya milenge," ku hlamula Ken.

"Ken, a ndzi swi koti no tlanga hi leswi
ndzi nga tsanisa xiswona. Ndzi lava
ntsena ku ya ekaya."



Thandi a khandziya bazi ra xikolo hi ku nonoka. "Ndzi navela ku tshama na Moyasi na Lisa," a ehleketa. Kambe Thandi u tshamile a ri yexe.

U hlalerile loko Moyasi na Lisa va hlevelana. U tivutisile leswaku hikwalaho ka yini vana hinkwavo va vulavula hi ku hlevetela. Nkarhi wun'wana na wun'wana loko a va languta, a va hundzuluka va languta etlhelo.

Ken na yena a hlevelana na vona.

"Xii, swi nga va swi lo yini?" ku ehleketa Thandi hi ku tsana.

"Ndzi lava ntsena ku hatla ndzi fika ekaya. Ndzi vile na siku ro biha," ku n'unun'uta Thandi a ri yexe.



"Nandzu wa kona hi wihi?" ku anakanya Thandi.

U langutile wachi ya yena leyintshwa.
A navela ku yi kombeta vanghana va yena.


"Swi lunghile!" a anakanya. "Ndzi ta fika ekaya hi 27 wa timinete na 42 wa tisekene. Kumbexana ndzi ta kota ku kombeta Moyasi na Lisa wachi ya mina mundzuku."

Thandi mbuya, a titwa a ri yexe.

Ku hava loyi a vulavuleke na yena.

Ku hava na loyi a n'wi languta.

"Xii, swi nga va swi lo yini?" ku ehleketa Thandi hi ku tsana.



Vana va chika ebazini ekusuhi na
yindlu ya ka vaThandi.

Thandi a tlhela a va huwelela.
"Moyasi, Moyasi! Moyasi! Lisa!
Vonani wachi ya mina leyintshwa!"
Kambe Moyasi na Lisa va hleka va
tsutsuma va famba.

Ken u yile eka Thandi. "Thandi,
hikwalaho ka yini u languteka u
tsanile? A hi fambe swin'we."



... kutani, Thandi na Ken va famba hi
ku nonoka va kongoma endlwini ya ka
vaThandi.

"Hikwalaho ka yini Moyasi na Lisa
va nga swi lavi ku vulavula na mina?"
Thandi a vutisa Ken.

"Xii, a ndzi swi tivi leswaku swi nga va
swi lo yini?" ku vula Ken a ri karhi a
n'wayitela swinene.



Thandi a pfula rivanti ra le mahlweni.
Mihlolo hakunene! Vana hinkwavo va
tlilasi a va helerile kwale.


"Xihlamariso! Siku lerinene ra ku
velekiwa!" ku huwelela vana va tlilasi
ya Giredi ya 3.

"Yhuu, sweswi ndza swi twisia
leswaku hikwalaho ka yini a mi ndzi
tsutsuma namuntlha!" ku vula
Thandi hi ntsako lowukulu.

"Hi kombete wachi ya wena
leyintshwa!" ku vula Moyasi na Lisa.

... Ken a n'wayitela a miyerile
"Xii, swi nga va swi lo yini?"

Vanghana lavanene va hlayisana.



Xana a wu swi tiva?



Khale ka khaleni, vanhu a va hlaya nkarhi hi ku xiya dyambu. A va kanelia ku hlangana nimpundzu, nihlekanhi kumbe nimadyambu. Loko u pfumela ku tirthela munhu, a wu pima tiawara ta ntirho wa siku ku suka loko dyambu ri tlhava ku fika loko ri pela. Nkarhi wo suka eka ximusi xin'we ku ya eka ximusi xin'wana a wu ri n'hweti, nkarhi wo suka eka ximun'wana xin'we ku ya eka ximun'wana xin'wana a wu ri lembe.

Endzhaku ka sweswo vanhu va tumbuluxile tindlela to pima minkarhi yo koma. Tanihi leswi lembe a ri avanyisiwile hi tin'hweti ta khumembirhi, va avanyisile nhlekanhi hi tiawara ta khumembirhi na vusiku hi tiawara ta khumembirhi. Hi ximumu, loko masiku ya ri yo leha, tiawara ta nhlekanhi na tona a ti ri to leha.

Swilo swa khale swo pima nkarhi hi nga si va na titliloko na tiwachi a swi ri swikomba-nkarhi hi dyambu na tinghilazi ta tiawara.

Xikomba-nkarhi hi dyambu i disiki ya xirhendzevutana leyi a yi funghiwile hi tiawara tanihi wachi. A xi ri xa xivumbeko xo ololoka lexi a xi endla ndzhuti eka disiki -nkarhi a wu

pimisiwa xileswi hi xikomba-nkarhi hi dyambu.



Nghilazi ya tiawara a yi endliwile hi tibalubu ta nghilazi ta xirhendzevutana timbirhi leti hlanganisiweke hi nhamu yo lala ya nghilazi exikarhi ka tona. Loko nghilazi ya tiawara yi hundzuluxiwa yi languta ehansi, ntsengo wa sava leri pimiweke ri chululukela ku suka eka balubu ya nghilazi ya le henhla ku ya eka ya le hansi.

Xana a wu tsaki hi leswi hi nga na tiwachi letitsongo ta kahle?



KU TALA HI NTSAKO

U va na siku ro hlawuleka
Mbilu ya wena a yi tale hi ntsako,
Rirhandzu na mafenya a swi ve swa wena,
N'wayitelo wa wena a wu ve wo anama,
Ntsako a wu ve lowu nga riki na ku hela,
Swilo swa kahle a swi te eka wena,
Ku navela ka wena a ku endleke,
Kateka hi siku ra wena ra ku velekiwa.



TISANI KHEKHE

A hi humesen tibaluni,
A hi humesen khekhe,
A hi timeni makhandhlela,
A hi tlangeleni.

U fanele ku va na ntsako,
A wu te eka wena,
U fanele ku rhandziwa,

Hi leswi ku nga siku ra wena
ro hlawuleka.

U va na siku lerinene ra ku
velekiwa!



Migingiriko yo hlaya hi mitlawa



1

Languta swifaniso.

- Byela munghana wa wena leswi humelelaka eka xifaniso xin'wana na xin'wana.
- Byela munghana wa wena leswaku i xifaniso xihi lexi faneleke ku va xo sungula, xa vumbirhi, xa vunharhu na xo hetelela.
- Tlhela u hlamusela munghana wa wena xitori u tirhisa swifaniso.



2

Yelanisa marito na swifaniso. Tirhisa swikoweto leswaku munghana wa wena a vhumba leswi u swi endlaka.

Tlhela u tirhisa rito rin'wana na rin'wana ku vumba xivulwa ku kombeta leswaku u twisia nhlamuselo ya rona.

hlevela endleveni			huwelela
hlekelela			tsanile
hlamala			languta
hleka			vukarha



3

Hlaya xitori nakambe kutani u byela munghana wa wena tinhlamulo ta swivutiso leswi landzelaka.

- I vamani swimunhuhatwankulu eka xitori lexi?
- Xana Thandi u amukele nyiko ya njhani hi siku ra yena ra ku velekiwa?
- I marito wahi eka papila ra 2 lama kombisaka leswaku Thandi a tsakile swinene hi nyiko ya yena?
- Hikwalaho ka yini a lava ku yi kombeta vanghana va yena?
- Xitori xi sungula xi tlhela xi hela Thandi a tsakile. I yini lexi nga endla leswaku Thandi a tsaka emasungulweni na le ka mahetelelo ya xitori?
- Ku humelela yini exikarhi ka xitori leswi khunguvanyisaka Thandi?
- Hi swi tivisa ku yini leswaku Thandi a kota ku hlava nkarhi?
- Hi ku ehleketa ka wena, Moyasi na Lisa a va ri vanghana va kahle? Hikwalaho ka yini?
- Loko u hlava hi leswi Thandi a titwiseke xiswona exikarhi ka xitori, xana u n'wi twele vusiwana? Hlamusela leswaku hikwalaho ka yini.
- Languta swifaniso exitorini. Swi nyika vuthala byihi lebyi hi byelaka leswaku vadyondzi a va ri ku kunguhateni xinkhubyana xa xihundla xa siku ra ku velekiwa?
- Loko munghana wa wena a ku hunisa hi siku ra wena ra ku velekiwa, a wu ta titwa njhani? A wu ta vula yini?
- Eku heteeleni ka xitori, Ken a n'wayitela. U ehleketa leswaku a n'wayitelela yini?



4

Titeke u ri Thandi.

Tsala minkarhi leyi landzelaka eka buku ya wena ya switoloveto kutani u tsala leswi ku humeleleke hi minkarhi yo hambana namuntlha.

07h00	
07h15	Ndzi khandziyile bazi ra xikolo.
07h30	
07h55	
10h00	
13h00	
14h00	Ndzi nghanile endlwini ya ka hina kutani ndzi vona vana hinkwavo va Giredi ya 3. A va ndzi endlele xinkhubyan xa xihlamariso.



5

Titeke wonge hi wena Moyasi kumbe Lisa. Endla khadi ra xirhambo u rhamba vadyondzi va Giredi ya 3 ku ta exinkhubyaneni xa xihlamariso ekaya ka vaThandi. Va tivise siku ra n'hweti, nkarhi na adirese. Tsundzuxa vadyondzi leswaku mhaka ya xinkhubyan i xihundla.

Siku ra n'hweti:	<hr/> <hr/> <hr/>
Nkarhi:	<hr/> <hr/> <hr/>
Adirese:	<hr/> <hr/> <hr/>
Tihlanganise na:	<hr/> <hr/> <hr/>